

16/04/2024

Aizawl

18:30 Hrs

REGIONAL NEWS

HEADLINES:-

1. Mizorama Lok Sabha member thlanna neih tur atana campaign hun chu naktuk tlai dar 5 ah a tawp dawn .
2. MPSC hnalak hrang hrang diklo ni a sawi chhui hna tibuai lo turin MZP chuan MPSC office kai tur dan an tawpsan.
3. BJP, AAP leh BSP ten Lok Sabha inthlanpui leh Assembly inthlana an candidate turte an puan belh.
4. President Draupadi Murmu-i chuan data zirchian leh fiahna behchhana hmasawna program kalpui chuan sawrkar in mipuite a tihhmasawna kawngah a pui nasa hle a ti.

<><><>

SVEEP

Mizorama Lok Sabha member thlanna neih tur atana campaign hun chu naktuk tlai dar 5 ah a tawp dawn a, hun tlem an la neih chuhin political party te chuan Mizoram hmun hrang hrang an hrut mek a ni.

Ni 19-a Lok Sabha member thlanna vote thlak tur hian vote nei chin te an thawh chhuah vek theihna turin sorkar lam pawhin campaign nen tan a la a, nizan khan Aizawl Zemabawk ah District Election Officer Pi Nazuk Kumar hovin vote thlak tura mipui sawmin Street Campaign neih a ni a. Systematic Voters Education and Electoral Participation hmalakna in Zemabawk bazaar kawngah vengchung thalai te hnenah election pawimawhna chungchang inhrilhhriatna neih a ni.

DEO Pi Nazuk Kumar chuan kalkhawmte hnenah chuan thalaite'n vote thlak leh election an ngaih pawimawh a tul a ti a, tun dinhmunah India ram mipui zinga a tam ber chu thalaite an nih avangin mipui sawrkarna ram a nihna humhim turin thalaite an pawimawh a ti a. Mizoram chuan MP pakhat chuah a neih avanga MP inthlan hi pawimawh ta lo riau anga ngaih na a awm theih thu sawiin, mi pakhat chauh pawh state hmasawna atan mi pawimawh lutuk a ni a ti a, MP thlan kawngah tih tak zetna nen vote thlak a tul a ti.

Kolasib district-ah pawh SVEEP kaltlangin Two Wheeler Rally buatsaih a ni a. Pu John LT Sanga, Deputy Commissioner chuan hun kaihruaiin Kolasib khaw chung a sawrkar pisa hrang hrang a thawktute kawngzawh tur hian lo an tel a, Diakkawngah vote thlak tur a thu tiam lakna hun neih a ni.

SVEEP kaltlang a vote thlak tur a mipuite zirtirna tur a Kolasib khaw chung a 2-Wheeler Rally buatsaih a nih bak ah hian Kawnpui Govt. Higher Secondary School-ah Pu Samuel Lalrinawma, Lecturer, SVEEP Resource Person chuan SVEEP Young Voter Awareness Program neih puiin Quiz hman a inelna kalpui a ni ani. Champhaiah chuan District Election Officeleh Sub-Hqrs. MHIP Champhai tangkawp chuan MHIP member-te tan inthlan kaihnawih hriattur pawimawh leh vote thlak pawimawhzia inzirtirna SVEEP Campaign MHIP Building, Old DC Complex-ah an buatsaih a.

He hun hi Pi Lalhmachhuani, President, Sub-Hqrs. MHIP, Champhai chuan a a kaihruai a ni.

<><><>

MYANMAR

Tunhnai chhovah Petrol leh Diesel bakah eichawp thil dang Lawngtlai District chhung a mi leh District pawnlam a mi chu, Lawngtlai District paltlangin Myanmar ram chung, Rakhine State ah tamthamtak phurhluh a ni reng a, hemi chungchangah hian nimin khan Central YLA Office - ah Central Young Lai Association Kumpulan Committee kaihhruihana hnuaiah, Lawngtlai District Legal Metrology, LADC Revenue Department leh Lawngtlai District Consumer Protection Association ten Joint Meeting neiin Lawngtlai town chhunga Petrol pump Pali bakah Bungtlang South atangin Petrol leh Diesel thahnem tak Myanmar lamah phurhluh thin a nih vanga mipui ten harsatna an tawh chungchang chu ngaimawhawm an tih thu an sawi, Joint Committee Meeting chuan DCSO Lawngtlai leh Lawngtlai DC hnenah mipuite tawrhna a thlenloh nan hmala tura ngen tha an ti.

Nitin eichawp mamawh hrang hrang, tamtham tak nitin Myanmar lama phurhluh thin a nih vanga mipui tawrhna thleng palh maithei a awm ni a hriaiin, Joint Meeting chuan thuneituten hma la thuai se an duh thu an sawi bawk.

Hetihlai hian vawiin khan Central YLA Kumpulan Committee chuan ngenna siamin, thenawm rama Oil leh bungrua thawnluh chu mipui himna leh khawsak phungah harsatna thleng palh thei a nih theih vangin vawiin atangin tiamchin awmlovin Myanmar a Oil leh bungrua thawnlut thinte chu tawpsan turin an ngen a ni.

><><>

MPSC

MPSC hnalak hrang hrangah diklo tam tak a awm ni a an ngaih avanga MPSC Chairman chu mawhphurhna laa bang tura phutin, MZP chuan vawiin khan MPSC Office kawtah zirlaite punkhawm an huaihawt chhunzawm a.

MZP chuan zing dar 8 atangin MPSC Office kai tur an dang tan a, MPSC hnathawktute tumah office kal luh tum an awm lo a, boruak muanawm tak hnuaiah hun hman a ni. MZP chuan chawhnu dar 2 khan MPSC Office kai tur dan hi a titawp rih a ni.

MZP hruaitute chuan hmalak chhunzawm zel dan tur ngaihtuahin a thukhawm a, Mizoram sawrkar Vigilance Department-in MPSC hnalak dana thil fello awmte chhuitu tur Inquiry Officer (I.O) atan Pu M. Lalmanzuala IAS pension, Mizoram Chief Secretary leh MPSC Chairman lo ni tawh a ruat chu lawmawm an tih thu a sawi a. Dikna duhmi, mi huaisen a nih avangin MZP chuan Inquiry Officer hi a ringtawk a, ngun takin a hmalak dan a ngaichang dawn a ni, an ti.

Inquiry Officer-in zalen taka hna a thawh theih nan leh, chak zawka hna a thawh theih nan MZP chuan MPSC Office kawta punkhawm chu neih chhunzawm rih loh nise a ti a bawk a. Chhui chianna hna thawh a nih chung chuan, MPSC Office chu khar a, tumah hna thawk lo turin MZP chuan thuneitute a ngen nghal bawk a ni.

<><><>

SAITUAL ASF

Saitual khaw chungah vawk engemawzat a thi tawh a, heng vawk thih chhan hi African Swine Fever (ASF) a ni tih finfiah a nih avangin hri hmuhna hmun hi INFECTED AREA a puan a ni.

Infected Area atanga vawk, vawksa leh vawksa atanga thil siam reng reng phurh chhuah emaw, lakluh khap tlat a ni a, Vawk thi reng reng paih mai lova

thuk takah chinai nen phum ngei ngei tur a ni a, Vawk hralh emaw, talh emaw khap tlat a nih bakah Vawk thi an awm in AH & Vety Department Official te hnenah hriattir vat tur tiin AH & Vety Office chuan thuchhuah a siam a ni.

<><><>

STORM

Nimin tlai dar 5:30 vel khan Meidum khua ah thlipui tleh vangin chenna In 7 a chhia a, heng zinga In 2 chu a chhe nasa hle.

Meidum VCP Pu Lalrosanga hnen atanga thudawn dan in, thlipui hian chenna In 7 ti chhia in, 2 chu luah zui tlak loh khawp in a chhia a, heng In chhia te hi vawiin khan VC leh YMA hnatlang in siam that ani a, Meidum VC te chuan Kolasib DC hnenah thil awmdan hriih in, DC chuan chhawmdawlna awm thei ang ang ngaihtuah sak a tum thu hriih in, mamawh a hman atan VCP hnenah Silpoulin 8 a pe ani.

<><><>

AIZAWL SP PRESS CONFERENCE:

Aizawl SP Pu Rahoo Alwal chuan tunhnaia Aizawl hmun thenkhata mi thil ruk ching mi pahnih an man thu a sawi.

Vawiin khan Aizawl SP Conference Hall-ah chanchinbu mite hmaah a sawi, Aizawl SP chuan Aizawl chhunga Police Station hrang hranga rukruk thubuui paruk chu a ti tu thuhmun a ni tih chhuichhuah a ni tih a sawi a, Vohbik Malsawmdawngzela, kum 23 mi Darlung khua tuna Zemabawk a khawsa mek chu Aizawl PS-a case pahnih, Bawngkawn PS a case pathumah leh Kulikawn PS a case pakhatah te a inhnamhnawih ngei a ni tih finfiah a ni, a ti.

Pu Rahoo Alwal chuan Mizoram State Election Officer Pu Madhup Vyas a chenna Quarter MINECO-a thirsakawr bo an chhui naah Malsawmdawngkima kum 33 Bungkawn veng a khawsa chuan a ruk ngei thu leh hemi bakah hian Aizawl Police Station-a rukruk thubuui pathumah a inhnamhnawih thu a sawi bawk.

Aizawl SP chuan tunlaiin Aizawl khawpui chhungah rukruk a hluar hle ni a sawiin chhung tin te fimkhur lehzual turin a chah a, mimal leh tlawmngai pawlte chu ruk ruk venna leh a man chhuahna kawngah, CCTV camera tun ai a hmang uar deuh deuh tura a duh thu a sawi bawk.

<><><>

BJP, AAP & BSP CNADIDATE

BJP chuan vawiin khan Lok Sabha inthlanpui, Odisha Assembly inthlan leh Telangana leh Uttar Pradesh Assembly By-election-a an candidate te hming an puang.

Odisha Assembly ah hian an candidate 21 te hming an puang a. Candidate zingah hian Rourkela-a ding tur Dilip Ray leh Bangriposi a ding tur Sanjali Murmu te pawh an tel a ni.

Hei bakah hian Maharastra, Punjab, Uttar Pradesh leh West Bengal-a Lok Sabha MP candidate te hming pasarih an puang bawk a. An zingah hian Maharastra-a Satara biala ding tur Chhatrapati Udayanraje Bhonsle te, Punjab-a Bathinda biala ding tur Parampal Kaur Sidhu leh Hoshiarpur-a ding tur Anita Sam Prakash te pawh an tel a ni.

Telangana leh Uttar Pradesh By-election a ding tur candidate panga te puan ni bawkin an zingah hian Dr. TN Vamsha Tilak chu Telangana-a Secunderabad biala ding tura tih a ni.

Vawiin vek khan Aam Aadmi Party te pawhin Punjab-a Lok Sabha MP candidate tur mi pali an puang bawk a. Heng zingah hian Ferozpur bialah Jagdeep Singh Kaka Brar leh Gurdaspur biala ding turin Amansher Singh te pawh an tel a.

Bahujan Samaj Party (BSP) pawhin candidate 11 hming an puang bawh a. Varanasi biala Prime Minister leh BJP hruaitu Narendra Modia khing turin BSP ten Athar Jamal Lari an dah a ni.

<><><>

PRESIDENT

President Draupadi Murmu-i chuan data zirchian leh fiahna behchhana hmasawna program kalpui chuan sawrkar in mipuite a tihhmasawna kawngah a pui nasa hle a ti. Vawiina Indian Economic Service tling tharte nen Rashtrapati Bhavan-a an inkawmnaah he thu hi sawiin Pi Murmu-i chuan IES officer tharte chuan ngaihtuahna thar hmante, tihdan tha leh thiamna thar hman tangkai an tum tur ani a ti a. Ram hmasawna turin ei leh bar economy hmasawn chu a pawimawh hle a ni a ti bawh.

<><><>

ELECTION

Lok Sabha inthlan thawhkhatna atana campaign chuan a vawrtawp a thleng chho mek a. Naktuk hi campaign theih hun tawp ni anih tawh avangin political party tinten mipui vote hui tumin an theihtawp an chhuah mek a. Inthlan thawhkhatna hi Zirtawpni ah vote thlak tur a ni a, State leh UT 21 chhunga Parliament bial 102 ah inthlan tur a ni ang.

Prime Minister leh Senior BJP leader Narendra Modia chuan vawiin hian Bihar-a Gaya leh Purnia ah te hun a hmang a. Tun tum hi Lok Sabha inthlanpui hun puan anih hnua Bihar a tlawh vawi thumna tur a ni.

<><><>